



# EKSPLORASI FOTOGRAFI

## MAKUM TEROKA DUNIA SENI DALAM KALANGAN GENERASI MUDA

Sumber: BPK

Program Eksplorasi Fotografi Majlis Kebudayaan Universiti-universiti Malaysia(MAKUM) 2012 anjuran Sekolah Pengajian Seni (SPS) dan Unit Kebudayaan Hal Ehwal Pelajar Universiti Malaysia Sabah (UMS) mampu mengetengahkan hasil karya para penggiat seni di negeri ini.

Pengarah Eksekutif Pusat Seni Suria, Datuk Raya Erom berkata, program tersebut amat bertepatan dalam usaha membuka mata generasi muda untuk didedahkan akan peri pentingya seni dalam kehidupan seharian.

Menurutnya, setiap individu sememangnya mempunyai nilai seni, namun ianya perlu digilap agar dapat diaplikasi khususnya dalam bidang kerjaya.

"Pembinaan sesebuah bangunan tidak mungkin sempurna dan indah jika jurutera atau arkitek tidak mengerti tentang nilai seni. Begitu juga dengan ciptaan telefon bimbit, sekiranya

tidak dilengkapi dengan elemen seni grafik serta warna dan nada dering yang menarik, sudah pasti telefon itu tidak diminati," ujar beliau ketika merasmikan majlis penutupan program tersebut siang tadi. Turut hadir, Setiausaha MAKUM, Noor Azrul Mohd Ariff dan Timbalan Dekan Sekolah Pengajian Seni, Dr. Zairul Anuar Md. Dawam.

Program yang diadakan buat kali kedua di UMS pada 6 - 11 Disember 2012 yang lepas itu bertujuan untuk mengajak pelajar-pelajar universiti yang aktif dalam bidang fotografi untuk menghayati hasil karya mereka disamping merasai nilai estetik melalui aplikasi formalistik pada setiap karya seni yang diperagakan.

Lebih 50 peserta merangkumi siswa siswi UMS, Universiti Utara Malaysia, Universiti Putra Malaysia, Universiti Pendidikan Sultan Idris, dan Universiti Sultan Zainal Abidin telah mengambil bahagian dalam program tersebut.